



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2017. GODINU STRANKE DEMOKRATSKE AKCIJE

Broj: 03-07-6-279/18
Sarajevo, 18.06.2019. godine

SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole.....	5
Cilj pregleda i kontrole.....	4
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE REVIZIJE.....	5
5.1 NALAZI.....	5
5.2. PREPORUKE.....	9

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja političke stranke Stranke demokratske akcije za 2017. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

Pregledom godišnjeg finansijskog izvještaja za 2017. godinu, utvrđeno je da je Stranka demokratske akcije prekršila odredbe člana 4. stav (1), člana 5. stav (4), člana 6. stav (2), člana 8. stav (4), člana 11. stav (1) i člana 12. stav (1) i stav (4) Zakona o finansiranju političkih stranaka.

Pregledom, odnosno kontrolom finansijskih izvještaja, osim gornjih napomena, nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka i člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Stranke demokratske akcije za 2017. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Stranka demokratske akcije se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	87.135,26	1,98
2.	Prilozi fizičkih lica (3-a)	719.307,42	16,33
3.	Prilozi pravnih lica (3-b)	40.800,00	0,93
4.	Prihodi od imovine (3-c)	56.110,00	1,27
5.	Prihodi od pr.lica (3-d)	0,00	
6.	Prihodi od poklona (3-e)	41.980,84	0,95
7.	Prihodi iz budžeta (3-f)	3.400.338,26	77,21
8.	Prihodi od propagande (3-g)	0,00	
I	Ukupni prihodi (1-8)	4.345.671,78	98,67
II	Ostali prihodi i drugo	58.626,16	1,33
	Izvori finansiranja (I+II)	4.404.297,94	100,00

U godišnjem finansijskom izvještaju stranka je iskazala rashode u ukupnom iznosu od 3.580.497,53 KM.

2. PREDSTAVLJANJE POLITIČKE STRANKE

Naziv političke stranke je Stranka demokratske akcije. Skraćeni naziv stranke je SDA.

Stranka demokratske akcije je Rješenjem broj: R-I-7/90 od 13.06.1990. godine upisana u registar Višeg suda u Sarajevu, a potom u registar poslovnih subjekata kod Općinskog suda u Sarajevu, gdje se vodi pod brojem: 065-0-RegZ-16-0003353.

Lice ovlašteno za zastupanje stranke je Bakir Izetbegović, predsjednik stranke.

Lice ovlašteno za podnošenje finansijskih izvještaja za 2017. godinu je Muamera Mulić.

Prema podacima iz godišnjeg finansijskog izvještaja za 2017. godinu, organizacionu strukturu Stranke demokratske akcije čine:

- Centrala SDA,
- 9 kantonalnih odbora,
- 6 regionalnih odbora,
- Gradski odbor Mostar,
- 83 općinskih/opštinskih odbora¹ i
- Organizacioni odbor SDA u Brčko distriktu BiH.

¹ Podaci iz izmjenjenog obrasca 1.1. finansijskog izvještaja (Podaci o teritorijalnoj organizaciji političke stranke) koje je stranka dostavila uz Očitovanje dana 14.01.2019. godine.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Stranke demokratske akcije za 2017. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i člana 15. Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Stranke demokratske akcije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava

4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Stranke demokratske akcije u periodu od 2004. do 2016. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršene revizije godišnjeg finansijskog izvještaja za 2016. godinu, Služba za reviziju je izdala Izvještaj o reviziji sa mišljenjem revizora, nalazima revizije i preporukama stranci da finansijska sredstva osigurana za finansiranje političke stranke koristi isključivo za ostvarivanje ciljeva utvrđenih svojim programom i statutom, da vodi evidenciju o priložima, bez obzira na koji način ih ostvaruje, da dobrovoljne priloge u novcu uplaćuje na transakcijski račun centrale stranke, da poslovne knjige vodi u skladu sa računovodstvenim propisima i da obrati pažnju na ispravnost knjigovodstvenih isprava i da uspostavi blagovremene i potpune evidencije o prihodima i rashodima. Stranci je, takođe, preporučeno da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka, da izvrši usaglašavanje obaveza sa svojim dobavljačima i provede odgovarajuća knjiženja u poslovnim knjigama, te da troškove izborne kampanje finansira sa računa koji prijavi u skladu sa članom 4.4 Izbornog zakona BiH.

Nerealizovane preporuke:

Na osnovu uočenih nedostataka u godišnjem finansijskom izvještaju za 2017. godinu, utvrđeno je da Stranka demokratske akcije nije ispoštovala preporuke revizije.

5. NALAZI I PREPORUKE REVIZIJE

5.1 NALAZI

a) Stranka demokratske akcije nije postupila u skladu sa odredbama odredbama člana 4. stav (1) Zakona o finansiranju političkih stranaka.

- (1) Stranka demokratske akcije je dostavila Program utroška sredstava za 2017. godinu u kojem je predvidjela ukupne troškove u iznosu od 3.139.424,10 KM.

Uvidom u finansijski izvještaj stranke utvrđeno je da je stranka u 2017. godini ostvarila ukupne rashode u iznosu od 3.580.497,53 KM i time utrošila sredstva mimo utvrđenog programa u iznosu od 441.073,43 KM.

- (2) Pregledom finansijskog izvještaja i finansijske dokumentacije za Centralu stranke, utvrđeno je da je politička stranka sredstva u iznosu od 249.287,83 KM utrošila mimo svog finansijskog plana rashoda, odnosno programa utroška sredstava za 2017. godinu.

- Stranka je na nivou Centrale stranke planirala *Naknade uposlenicima (topli obrok, prevoz i regres)* u iznosu od 35.000,00 KM, a iste je ostvarila u iznosu od 60.685,00 KM, što je za 25.685,00 KM više od planiranog iznosa.
- Centrala Stranke demokratske akcije je planirala *Troškove naknada po ugovorima plus poreze* u iznosu od 65.000,00 KM, a iste je ostvarila u iznosu od 88.803,27 KM, čime je iste prekoračila za iznos od 23.803,27 KM. Takođe, stranka je troškove *Bruto plaća* planirala u iznosu od 500.000,00 KM, a iste ostvarila u iznosu od 504.854,12 KM.

Na isti način, stranka je troškove platnog prometa za 2.139,22 KM i humanitarne rashode za 1.734,00 KM ostvarila u većem iznosu u odnosu na planirane rashode.

- Uvidom u Finansijski plan za 2017. godinu utvrđeno je da stranka nije predvidjela sredstva za troškove advokatskih usluga, sudska izvršenja i vansudska poravnanja za centralu stranke, kao posebne stavke, dok je Centrala stranke ostvarila troškove advokatskih usluga u iznosu od 4.593,00 KM, sudska izvršenja u iznosu od 127.697,72 KM i vansudska poravnanja u iznosu od 633,18 KM, što ukupno iznosi 132.923,90 KM.
- Stranka demokratske akcije u okviru plana na nivou Centrale nije predvidjela izdatke za kupovinu osnovnih sredstava, a za istu namjenu je utrošila sredstva u iznosu od 58.148,32 KM.

U 2017. godini, stranka je u poslovnim knjigama za Centralu stranke evidentirala dugoročne obaveze koje su nastale po osnovu kupovine nekretnine u Tesliću u prethodnim godinama. U svrhu otplate poslovnog prostora u Tesliću u 2017. godini stranka je utrošila sredstva u iznosu od 19.341,79 KM.

Takođe, stranka je u 2016. godini kupila dva automobila marke „Toyota“, u podlizing po principu staro za novo. Na ime plaćanja automobila stranka je u 2017. godini utrošila sredstva u iznosu od 38.806,53 KM.

b) Stranka demokratska akcija prekršila je odredbe člana 5. stav (4) i člana 6. stav (2) Zakona o finansiranju političkih stranaka.

- (1) Stranka demokratske akcije u poslovnim knjigama i finansijskom izvještaju nije iskazala nenovčanu donaciju po osnovu besplatnog korištenja poslovnog prostora u vlasništvu Općine Kupres, čime je prekršila odredbe člana 5. stav (4) Zakona o finansiranju političkih stranaka.

Uvidom u akt Općine Kupres broj: 02/2-14-2-568/18 od 09.04.2018. godine, utvrđeno je da je Stranka demokratske akcije, odnosno njen odbor, tokom 2017. godine koristio poslovni prostor u vlasništvu Općine Kupres bez naknade.

Politička stranka je korištenjem poslovnog prostora u vlasništvu općine, bez plaćanja zakupnine, primila nenovčanu donaciju, koju je imala obavezu da evidentira u poslovnim knjigama za 2017. godinu.

- (2) Stranka demokratske akcije prekršila je odredbe člana 6. stav (2) Zakona o finansiranju političkih stranaka jer prilozi fizičkih lica u ukupnom iznosu od 358.036,72 KM i prilozi pravnih lica u ukupnom iznosu od 22.300,00 KM nisu uplaćeni na transakcijski račun Centrale stranke.

Uvidom u izvode sa transakcijskog računa i obrasce finansijskih izvještaja utvrđeno je da su na transakcijski račun Centrale uplaćeni prilozi fizičkih lica u iznosu od 350.280,97 KM i prilozi pravnih lica u iznosu od 18.500,00 KM, dok su prilozi fizičkih i pravnih lica nižih organizacionih dijelova uplaćeni na transakcijske račune organizacionih odbora.

c) Stranka demokratske akcije prekršila je odredbe člana 8. stav (4) Zakona o finansiranju političkih stranaka.

Stranka demokratske akcije je ostvarila zabranjene priloge u ukupnom iznosu od 3.500,00 KM, čime je prekršila odredbe člana 8. stav (4) Zakona o finansiranju političkih stranaka, jer je pravno lice „Džena“ doo, koje je dalo prilog stranci u 2017. godini sklopilo ugovore o javnim nabavkama roba, usluga i radova sa organima izvršne vlasti na svim nivoima u Bosni i Hercegovini čija je vrijedost veća od 10.000,00 KM.

Na osnovu obavljenog pregleda finansijskog izvještaja, utvrđeno je da je Stranka demokratske akcije primila prilog pravnog lica: „Džena“ doo u iznosu od 3.500,00 KM,

Uvidom u podatke koje je dostavila Općina Kladanj², utvrđeno je da je Općina Kladanj tokom 2017. godine imala sklopljen ugovor sa pravnim licem „Džena“ d.o.o. o javnoj nabavci ukupne vrijednosti 180.248,16 KM, a koji se odnosi na izvođenje radova na projektu „Izgradnja objekta-Sportska dvorana u Kladnju – II faza“.

d) Stranka je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu obavljenog pregleda godišnjeg finansijskog izvještaja i prikupljene finansijske dokumentacije, utvrđeno je da Stranka demokratske akcije nije u skladu sa računovodstvenim propisima i odredbama Zakona o finansiranju političkih stranaka uspostavila potpune i tačne evidencije o svojim prihodima i obavezama, niti je godišnji finansijski izvještaj popunila u skladu sa odredbama Pravilnika o godišnjim finansijskim izvještajima političkih stranaka-u daljem tekstu: Pravilnik, čime su prekršene odredbe člana 11. stav (1) i člana 12. stav (1) i stav (4) Zakona o finansiranju političkih stranaka³.

(1) Stranka demokratske akcije nema potpune i tačne evidencije o osnovnim sredstvima.

Pregledom, a na osnovu raspoložive dokumentacije, utvrđeno je da je stranka izvršila kupovinu dva automobila marke Toyota po principu staro za novo. Uvidom u poslovne knjige, utvrđeno je da je stranka iz svojih poslovnih knjiga u 2016. godini isknjižila vozila marke Toyota, te započela otplatu novih vozila koja su nabavljena u podlizing, a nabavku istih je evidentirala u svojim poslovnim knjigama tek u 2017. godini.

(2) U obrascu 3-c finansijskog izvještaja (prihodi od imovine) stranka je prihod od imovine pravnog lica „Kedaš“ iskazala u većem iznosu za 2.166,70, KM, dok je prihod od imovine pravnog lica „Dženana optika“ iskazala u manjem iznosu za 370,00 KM, čime je prekršila odredbe člana 16. Pravilnika.

- Uvidom u ugovor o iznajmljivanju poslovnog prostora pravnom licu „Kedaš“ i poslovne knjige stranke, utvrđeno je da je zakupnina za pet mjeseci u 2017. godini iznosila 2.833,30 KM, dok je stranka u poslovnim knjigama evidentirala prihode u iznosu od 5.000,00 KM.
- Uvidom u poslovne knjige i ugovor o iznajmljivanju poslovnog prostora pravnom licu „Dženana optika“, utvrđeno je da stranka u poslovnim knjigama nije evidentirala prihode od zakupnine za decembar u iznosu od 370,00 KM.

(3) Pregledom godišnjeg finansijskog izvještaja i dodatne finansijske dokumentacije, utvrđeno je da je stranka u finansijskom izvještaju ostale prihode iskazala u većem iznosu za 27.830,94 KM u odnosu na ostvarene, a koji su rezultat pogrešnih evidencija.

² Akt Općine Kladanj, broj: 03/1-14-2348/18 od 31.10.2018. godine sa prilogom Ugovora.

³ Politička stranka dužna je voditi poslovne knjige i podnositi finansijske izvještaje na način koji je utvrđen zakonom i drugim propisima u skladu sa zakonom.

- Uvidom u dokumentaciju za ostale prihoda Centrale stranke, utvrđeno je da je stranka iskazala kao prihod stranke povrat takse za Lokalne izbore 2016. godine izvršen od strane Centralne izborne komisije BiH u iznosu od 16.500,00 KM, a što ne predstavlja prihod stranke.

Takođe, u okviru ostalih prihoda stranka je iskazala uplatu sredstava u iznosu od 1.053,00 KM od strane Hercegovačke banke dd Mostar u likvidaciji, a po osnovu verifikovanog potraživanja iz likvidacione mase banke. Navedena uplata ne predstavlja prihod stranke, već naplatu potraživanja stranke, koja je stranka u prethodnom periodu trebala biti evidentirana u okviru potraživanja.

- U Opštinskom odboru SDA Travnik stranka je u okviru ostalih prihoda iskazala 4.778,67 KM koji ne predstavljaju prihod stranke. Uvidom u dokumentaciju utvrđeno je da je navedena sredstva uplatio Centar za socijalni rad Travnik po osnovu nadoknade zaposlenom za vrijeme porodijskog odsustva sa posla, te ne predstavljaju prihod.
- Stranka je zbog činjenice da je u svojim poslovnim knjigama u 2017. godini izvršila ispravke pogrešnih evidencija neosnovano uvećala svoje prihode u iznosu od 5.499,27 KM. Naime, uvidom u poslovne knjige utvrđeno je da je stranka u svojim poslovnim knjigama dva puta evidentirala račune dobavljača „Almy“ Zenica u iznosu od 219,50 KM, „BH Telekom“ u iznosu od 257,48 KM i Hotel „Bristol“ u iznosu od 983,00 KM, kao i troškove zakupa OO SDA Bužim u iznosu od 252,00 i Centrale stranke u iznosu od 3.787,29 KM, te u 2017. godini izvršila ispravke pogrešnih knjiženja.

(4) Stranka u poslovnim knjigama nije uspostavila tačne evidencije o svojim obavezama i nije iskazala sve svoje obaveze u obrascu 5 (obaveze političke partije) finansijskog izvještaja, čime je prekršila odredbe člana 24. Pravilnika.

- Uvidom u Izvod otvorenih stavki na dan 31.12.2017. godine, utvrđeno je da Centrala Stranke demokratske akcije ima obaveze prema dobavljaču „Bunjo“ u iznosu od 1.705,00 KM, dok je stranka u poslovnim knjigama i obrascu 5 iskazala obaveze prema ovom pravnom licu u iznosu od 50.145,75 KM.

Centrala SDA je u godišnjem finansijskom izvještaju iskazala obaveze prema dobavljaču „Centrotrans“ u iznosu od 21.800,00 KM. Uvidom u Izvod otvorenih stavki na dan 31.12.2017. godine, utvrđeno je da Stranka demokratske akcije nije imala obaveze prema ovom dobavljaču.

Stranka je u poslovnim knjigama iskazala obavezu prema Gradu Mostar u iznosu od 117.224,08 KM, iako nema podatke o stvarnoj obavezi.

- Uvidom u poslovne knjige stranke utvrđeno je da stranka u finansijskom izvještaju nije iskazala dugoročne obaveze prema fizičkom licu po osnovu kupoprodaje nekretnine u iznosu od 22.236,39 KM.

Na osnovu raspoložive dokumentacije utvrđeno je da je stranka u svojim poslovnim knjigama evidentirala obaveze po osnovu kupoprodaje nekretnine u Tesliću od fizičkog lica. Prema podacima iz poslovnih knjiga na dan 31.12.2017. godine obaveze stranke po ovom osnovu iznosile su 22.236,39 KM.

- Uvidom u dokumentaciju Centrale SDA utvrđeno je da je stranka na osnovu Rješenja Općinskog suda u Sarajevu, a po presudi Kantonalnog suda u Sarajevu isplatila sredstva u ukupnom iznosu od 124.531,80 KM. Sredstva su isplaćena na ime izvršenih usluga pravnom licu „Europlakat“ i pripadajućih troškova parničnog i izvršnog postupka.

Činjenica da je stranka u svojim poslovnim knjigama isplate po presudama evidentirala na troškovima sudskih izvršenja ukazuje da stranka nema adekvatne evidencije o obavezama niti uvid u stanje svojih obaveza.

Troškovi kampanje

Stranka demokratske akcije je učestvovala na Prijevremenim izborima za načelnika Općine Glamoč.

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁴ po biraču u svakom izbornom krugu, a prema broju birača koje je objavila Centralna izborna komisija BiH.

Prema podacima Centralne izborne komisije BiH, a na osnovu broja birača, stranka je u svrhu izborne kampanje za Prijevremene izbore za načelnika Općine Glamoč mogla potrošiti sredstva u iznosu od 1.323,60 KM.

Stranka demokratske akcije u godišnjem finansijskom izvještaju za 2017. godinu nije iskazala troškove propagande. Takođe, stranka je dostavila izjavu u kojoj je navela da prema podacima iz finansijske dokumentacije nije bilo nikakvih izbornih troškova vezanih za Prijevremene izbore za načelnika Općine Glamoč.

5.2. PREPORUKE

Preporučuje se Stranci demokratske akcije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva obezbijedena za finansiranje stranke koristi u skladu sa utvrđenim programom utroška sredstava,*
- *da u poslovnim knjigama i finansijskom izvještaju evidentira sve donacije, uključujući nenovčane, te da priloge fizičkih i pravnih lica uplaćuje na transakcijski račun glavnog odbora stranke,*
- *da se ne finansira iz izvora koji su zabranjeni političkim strankama,*
- *da poslovne knjige vodi u skladu sa računovodstvenim propisima, odnosno da uspostavi tačne evidencije o prihodima, rashodima i obavezama stranke i*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR

Stranka demokratske akcije se u ostavljenom roku očitovala na Preliminarni izvještaj o pregledu godišnjeg finansijskog izvještaja za 2017. godinu.

U očitovanju stranka je dostavila dokaz o vraćanju zabranjenih priloga: Općini Vitez u iznosu od 200,00 KM Udruženju Merhamet Bihać u iznosu od 200,00 KM, i pravnim licima: „KM Gradanja“ u iznosu od 200,00 KM, Preduzeće za puteve DD Mostar u iznosu od 9.300,00 KM, „Babić“ doo u iznosu od 3.000,00 KM, „Grafičar“ doo u iznosu od 1.000,00 KM i „AC Quattro“ doo u iznosu od 6.194,00 KM. Služba za reviziju je uvažila argumentovane primjedbe, korekcije i ispravljene obrasce 1.1 i 2. i korigovala nalaze navedene u Preliminarnom izvještaju.

Revizor

Veliborka Kenjić

Pomoćnik revizora

Anela Burdžović Kapić

Šef Službe za reviziju

Mr.sc Hasida Gušić

⁴ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.